

Osá Osirúami

mapurigá San Pablo oséli echo'ná

TESALÓNACHI PIRÉAMI

Pablo osé echo'ná Tesalónachi piréami napawika bichíiyami ritémtami

1 Nijé Pablo, 'yemi mi osé si'néami máputamo napawika bichíiyami ju echo'ná Tesalónachi anilíwachi walúlachi piréami. Echi Silbano, echi Timoteo ayénachó 'yemi mi ripora, 'yemi máputamo napawíkami ju Riosi yuwa, echi mapu tamujé Onolá ju, ayénachó máputamo napawíkami ju echi Walubela Jesucristo yuwa. ²Nijeni nakí mapu echi Walubela Riosi, tamujé Onolá, ayénachó echi Walubela Jesucristo 'yemi mi wabé galigá ku'wírama, ayénachó mapu 'yemi mi 'yama mapurigátamo we galá kilíi ologá pirélabo.

Riosi walú kastigo 'yama echi jaré chati sitíi oláami echalí mapalí echi Walubela Jesucristo ku nawama jena'í wichimóbachi

³Keni ritémawa arigá 'wérali ju mapu tamujeta sinibí walú natétara 'yabo Riosi 'yemi jiti. Ne wabé galabé ju máputa echirigá natétara 'yabo Riosi mapujiti 'yémitamo sinibí waminabi galá bichíísimi, ayénachótamo si'néami sinibí waminabi galá galésimi a'nagupi. ⁴Echijiti tamujé aboni ne wabé nóchaga ra'ichata 'yemi jiti rugá, mapalita ra'icha echi auché jaréana piréami napawika bichíiyami ritémtami, mapujiti mapalí 'yémitamo ne wabé risúu ologá a'najátarami ju, echalí 'yémitamo arigá sinibí waminabi galá bichíísimi, ayénachó 'yémitamo arigá galá anacha mapalí echi auché jaré pagótami 'yemi mi ne wabé risúu olá. ⁵A'lí mapalí 'yémitamo echirigá anacha, echalítamo ne galá machira echi auché jaré pagótami mapurigá Riosi ne wabé galabé ju, tarapé sitíraga, mapalí Binói 'yemi mi risensia 'yali máputamo sinibí niráa muchibo echo'ná ripá riwigachi, mapo'ná Binói sinibí niráa Galabé Nuláami ju. A'lí jipi rawé 'yemi bichíiyami arigá ne wabé risúu olárami ju mapujítamo bichíi Jesucristo niráa.

⁶Pe waminánomí Riosi ne wabé risúu nílata echi jaré chati sitíi oláami pagótami mapu 'yemi mi echirigá risúu olá jipi rawé, chopi mapalí Riosi echirigá risúu nílata aboni, echalí Binói arigá ne galabé, tarapé sitíraga olama, mapujiti arigá 'wérali ju mapu aboni kastigo 'yárami níima. ⁷Ayénachó Riosi ne wabé galabé, tarapé sitíraga olama mapalí Binói 'yemi mi 'yama mapurigátamo galá ku isábabo, ne si'néami mapu ikítamo wabé risúu olárami ju jipi rawé, achigórigá mapurigá Binói tamujé tamí 'yama mapurigá tamujeta ayénachó galá isábabo. A'lí je'ná jerigá ikimea echalí ne jubá rawé mapalí echi Walubela Jesucristo ke sayiná ku nawama,

echo'ná ripá riwigachi jonsa, echi jaré wikabé wabé jiwérami Riosi kapitánawala yuwa. Echálí echo'ná Binóichi moba, ne noligá ne wabé ratábama mapurigá ne walú rajáami niráa. ⁸Echalí echi Walubela Jesucristo ku nawama ne walú kastigo 'yámiya echi jaré mapu ketasi nakili bichífinala Riosi, ne si'néami mapu ikí ketasi nijéwanali echi we Galabé Ra'íchali, tamujé Walubela Jesucristo Ra'íchala. ⁹A'lí aboni ne sinibí niráa walú kastigo 'yárami níima, ayénachó aboni sinibí niráa waminá 'wigáami níima. A'lí aboni chakena waná ulútami níima mapurigá aboni ke siné muchima echi Walubela Jesucristo yuwa, ayénachó mapurigá aboni ke siné riwimea mapurigá Jesucristo ne Walubela niráa ju, ne wabé omériga oláami ju. ¹⁰Mapujiti echálí rawé echi Walubela Jesucristo ke sayiná ku nawama jena'í wichimóbachi, mapurigá Binói waminabi walubélaga anérami níima echi jaré Binói níwala pagótami jiti, ayénachó mapurigá ne si'néami aboni galá ba'yóriga riwimea Binói Jesucristo, ne wabé Walubela niráa. A'lí 'yémitamo ayénachó echirigá riwiboa echi Walubela Jesucristo mapujítitamo ma galá bichíili tamujé nawésawala.

¹¹Echijiti ne sinibí rawé tamujeta we ra'icha Riosi yuwa, 'yemi jiti tániga, máputamo waminabi ne galá bichíiyami níibo, ayénachó mapurigá Riosi Binói galá nirama mapurigá 'yémitamo galá bichíili, echálí jonsa mapalí Binói 'yemi mi bayeli bichífinala. Ayénachóta táni mapu Riosi 'yemi mi ne wabé omératama mapurigátamo galá omérabo olayá suwaba mapu ikí 'yemi aboni nakí galabé niráa olánala, ayénachó máputamo omérabo olayá suwaba mapu ikítamo galá bichíiga olá, Riosi nóchala olayá. ¹²Echalí tamujé Walubélawala Jesucristo waminabi wabé walubélaga anérami níima, mapujiti 'yémitamo echirigá galabé ologá piré. Ayénachó Jesucristo 'yemi mi 'yama máputamo wabé o'wéalatami níibo mapujiti tamujé Riósawala ne wabé galabé ju, ayénachó mapujiti echi Walubela Jesucristo ne wabé galabé ju.

**Echi bilé wabé omérami rijói wabé chati sitíi oláami,
mapu nolínama jena'í wichimóbachi**

2 Jipi 'yemi ritémtami, tamujeta galá bichíi mapu echi Walubela Jesucristo ke sayiná ku nawama jena'í wichimóbachi mapalí Binói tamujé tamí napabúmiya nawama mapurigata Binói yuwa napabúrami níibo. Chopi tamujeta 'yemi mi táni ²máputamo ketasi siné si'winárigá bichíiibo. Echijiti ketasi majáratami níisi a bilé chati iwigá 'yemi mi ra'íchasagá jeanigá mapu ma sébali echi Walubela Jesucristo rawéwala. Nirapé majáratami níisi a jaré pagótami 'yemi mi nawésasagá jeanigá mapu ma sébali echi Walubela Jesucristo rawéwala. Nibilé cho majáratami níisi, átamo siné káachi 'nésagá bilé oselí osirúami jeanigá mapu ma sébali echi Walubela Jesucristo rawéwala. Arigá ketasi bichíisi mapalí echi auché jaré pagótami 'yemi mi 'yékkaka anema mapu echi oselí, nijé Pablo oselíwala ju, mapujiti nijeni ke siné echirigá anigá osimea. ³Ketasi ariwesi máputamo echirigá 'yékkarami níibo, mapujiti ne bachá niráa mapalí echi Walubela Jesucristo ke cho ku nawá jena'í wichimóbachi, echálí arigá ikimea mapu echi jaré pagótami jena'í wichimóbachi piréami ne wabé sayérami nílama Riosi. Echálí ayénachó bachá niráa nolínama jena'í wichimóbachi echi bilé wabé omérami rijói, ne wabé simírami chati sitíi oláami, echi mapu arigá káraga suwábarami níima waminánomí. ⁴A'lí echi wabé simírami chati sitíi oláami rijói ne wabé sayérama echi Walubela Riosi, ayénachó sayérama suwaba karúmati mapu ikí echi jaré ke bichíiyami pagótami galá riosi ané, ayénachó

arigá sayérama ne suwaba echi jaré amachíkalawami namuti jena'í wichimóbachi nirúami. A'lí echi wabé chati sitíí oláami rijói echo'ná Riosi ri'obáwalachi nawagá asibáma jeanigá mapu binói ne bichíwali echi Walubela Riosi ju.

⁵ ¿Kéchatamo newalá mapurigá nijeni 'yemi mi je'ná jerigá aneli chabénala mapalini abijí echo'ná 'yemi yuwa asali? ⁶ Ayénachó jipi 'yémitamo galá machí chigá jú mapu ketasi ariwé mapurigá echi wabé simírami chati sitíí oláami rijói ne machiná niráa nolnana jena'í wichimóbachi. Chopi mapalí ma seba binói tétawala, echalí 'nalina ma echi wabé simírami chati sitíí oláami rijói ne bichíwali ne machiná niráa nolnana jena'í wichimóbachi. ⁷Mapujiti jipi echi wabé chati sitíí oluwáwami we chiná niráa nocha echo'ná pachá echi jaré chati sitíí oláami pagótami sulálachi. Chopi Bilé nirú mapu ketasi ariwé mapu echi pagótami ne wabé simírami chati sitíí chuwé olama jipi rawé. A'lí mapalí Échiko waminá 'yératami níisa, echalí echi jaré chati sitíí oláami pagótami ne bichíwali ne wabé simírami chati sitíí chuwé olama. ⁸Chopi echalí 'nalí rawé echi wabé simírami chati sitíí oláami rijói ne machiná niráa nawama jena'í wichimóbachi. A'lí echalí mapalí echi Walubela Jesucristo ne wabé ratábami niráa ku nolnana jena'í wichimóbachi, echalí Binói waminá púchaga mi'limea echi wabé simírami chati sitíí oláami rijói. ⁹A'lí mapalí echi wabé simírami chati sitíí oláami rijói echirigá nolnana jena'í wichimóbachi, echalí échiko chopi nawama mapujiti echi Satanasi riwéami riablo we nulugá julama. A'lí echi wabé simírami chati sitíí oláami rijói ne wabé omériami níima. Ayénachó binói wisabé, ne wabé 'yéka niraá, ne wabé omériga olama mapurigá ke wesi pagótami omero olayá. ¹⁰Ayénachó echi wabé simírami chati sitíí oláami rijói suwaba karúmati echirigá ne wabé chati sitíí ologá, ne wabé 'yéka echi jaré pagótami jena'í wichimóbachi piréami, si'néami mapu ikí waminá 'wigáami níimako, mapujiti aboni ketasi nakili bichífinala echi ne Bichíwali, mapurigá aboni echirigá galá ku wikawárami níima. ¹¹Echijiti Riosi ariwema mapurigá aboni ne wabé 'yékarami níima, mapurigá aboni chopi bichífima echi ne wabé 'yékalawami, ¹²mapurigá aboni walú kastigo 'yárami níima, si'néami mapu ikí ketasi nakili bichífinala echi ne bichíwali, si'néami mapu ikí chopi waminabi wabé nakili olánala echi wabé chati sitíí oluwáwami.

Echi jaré mapu Riosi chapili mapurigá aboni ku wikawárami níima

¹³Chopi arigá 'wérali ju mapu tamujeta sinibí walú natétara 'yabo Riosi 'yemi jiti, si'néami máputamo ikí galá bichíiyami ritémtami ju, mapu echi Walubela Jesucristo 'yemi mi ne wabé galé, mapujiti echi Walubela Riosi 'yemi mi chapili ki'yá chokichí jonsa mapurigátamo ku wikawárami níibo, mapurigátamo ne galabé oláami niwárami níibo, echi we Galabé Riosi Iwigala jiti, mapujiti 'yémitamo galá bichíili echi ne Bichíwali. ¹⁴Echijiti mapalí tamujé 'yemi mi nawésali echi we Galabé Riosi Ra'íchala, echalí Riosi 'yemi mi bayeli mapurigátamo galá bichíibo, ayénachó mapurigátamo wabé o'wéalatarami níibo waminánomí, tamujé Walubélawala Jesucristo yuwa.

¹⁵Sinibí waminabi ne galá bichíiga pirélasí, 'yemi ritémtami. Ketasi siné wikawási, chopi sinibí 'natasi mapurigá tamujeta 'yemi mi binérali mapalita 'yemi mi nawésali Riosi Ra'íchala, ayénachó mapalí tamujeta 'yemi mi oséli Riosi Ra'íchala. ¹⁶⁻¹⁷A'lí tamujeta nakí mapu Jesucristo Binói 'yemi mi kanílatama sulachí niráa, ayénachó mapu Riosi Onorúami 'yemi mi echirigá kanílatama, ayénachó mapurigá Riosi 'yemi

mi waminabi galá bichíiratama mapurigátamo sinibí ne galabé niráa ra'ichábo, ayénachó mapurigátamo sinibí ne galabé niráa olabo. A'lí echi Walubela Riosi Onorúami níili mapu ne wabé galabé ologá, tamujé tamí ne wabé galeli. Ayénachó Binói tamujé tamí 'yali mapurigata ne sinibí niráa wabé kanílatami níibo, ayénachó mapurigata galá bichíiibo máputa ku'wíratami níibo, mapujiti Binói tamujé tamí ne wabé galeli.

**Echi Pablo táni mapu echi jaré ritémtami Riosi yuwa ra'íchaga
tánama mapurigá binói Pablo ku'wíratami níima**

3 'Yemi keni ritémawa, ne jubá niráa, 'yemi nimí táni máputamo Riosi yuwa ra'íchaga tánabo tamujé tamí jiti, mapurigá ke 'me ayó tamujeta galá omérabo nawésiya Riosi Ra'íchala ne suníami, ayénachó mapurigá wikabé pagótami galá bichííma, achigórigá mapurigá ikili chabénala echo'ná 'yémichi, mapalita 'yemi mi nawésali. ²Ayénachó tansi Riosi mapurigá tamujeta galá ku'wíratami níibo mapurigá echi jaré wabé chati sitíí oláami rijói, we kichíami, ketasi tamujé tamí chibi olama, mapujiti wikabé ketasi bichíí Riosi. ³Chopi echi Walubela Jesucristo ne wabé bichíwaga oláami ju. A'lí Binói 'yemi mi waminabi galá bichííratama, ayénachó 'yemi mi tibútama mapurigá echi chati sitíí oláami riablo ketasi 'yemi mi suwábama. ⁴A'lí echi Walubela Jesucristo tamujé tamí bichíírata mapu 'yémitamo sinibí galá olá achigórigá mapurigá tamujeta 'yemi mi nuleli. Ayénachó tamujé tamí bichíírata mapu 'yémitamo sinibí echirigá olísabo. ⁵Tamujeta ne wabé nakí mapu echi Walubela Jesucristo 'yemi mi ku'wírama mapurigátamo galá machiboa mapu chu yena 'yemi mi galé Riosi, ayénachó mapurigátamo sinibí kilíí ologá anachabo mapurigá echi Walubela Jesucristo anáchali.

⁶'Yemi ritémtami, tamujé 'yemi mi nulé, tamujé Walubélawala Jesucristo nulalila jiti, máputamo waná ariwebo mapuyíripi rijimala mapu ke nakíko nochánala, mapuyíripi ketasi ologá bité mapurigá tamujé 'yemi mi binérali máputamo olabo. ⁷A'lí 'yémitamo ma galá machí mapu churigá galá níima olasa, mapurigátamo achigórigá olabo mapurigá tamujeta sinibí olá, mapujiti tamujé ke sineta ariweli nocha mapalita echo'ná 'yemi yuwa piréali. ⁸Nirapeta wepi chuwé ko'wali auché jaré níwala ko'wáami. Chópita 'wérali ologá sinibí rawé, sinibí rokokó, wabé nóchaga ko'wali mapurigata ketasi suwebo 'yemi níwala ko'wáami. ⁹A'lí echalita arigá risensia níwali máputa tabo mapurigá 'yémitamo tamujé tamí 'yabo echi ko'wáami, mapujiti echalí tamujeta 'yemi mi nawésiya 'yénali Riosi Ra'íchala. Chopi si'winárigá tamujeta sinibí we nóchaga ko'wali tamujé aboni ko'wáamawala mapurigata echirigá 'néрабо 'yemi mapu churigá galá níima mapu 'yémitamo ayénachó olabo. ¹⁰Mapujiti chabénala mapalita abijí echo'ná 'yemi yuwa muchili, tamujeta 'yemi mi je'ná jerigá nuleli: A bilé rijói ketasi nakísáagá nochánala, galá níima mapu ketasi cho ko'mea. ¹¹Mapujiti auché jaré tamujé tamí ané mapu jaré 'yemi ketasi nóchaga piré, máputamo wepi 'yénega echo'ná auché jaréana bitichí, we nakí nulánala mapurigá echo'ná o'wéala niráa. ¹²Jipi tamujeta we táni echiyiri rijói mapu ibili niráa ne galá kilíí nóchaga, galá mega ko'mea aboni níwala ko'wáami. A'lí tamujeta 'yemi mi echirigá nulé tamujé Walubélawala Jesucristo nulalila jiti.

¹³'Yemi keni ritémawa, ke siné ariwesi ne wabé galabé olayá. ¹⁴A'lí a bilé rijói ketasi galá nijéwasagá mapurigá tamujeta 'yemi mi je'ná jerigá osegá nulé, ne galá machísí si'néami 'yemi mapu chigá jú echiyiri rijói. A'lí ketasi yuwa yénasí

echiyiri rijói yuwa, mapurigá binói echijiti we riwélama. ¹⁵Chopi ketasi waminá sayérase echiyiri rijói, mapujiti arigá rijimala niráa ju. Si'winárigá wabé galigá ruyesi mapurigá galá nijéwama tamujé nulalila.

Pablo nakili mapu echi Walubela Jesucristo sinibí ku'wírama echi jaré bichíiyami

¹⁶A'lí echi Walubela Jesucristo Binói sinibí 'yemi mi 'ya máputamo kilíi ologá piré. Nijeni wabé nakí mapu Binói 'yemi mi 'yama mapurigátamo arigá sinibí waminabi galabé kilíi ologá pirélabo. Ayénachóni nakí mapu echi Walubela Jesucristo sinibí níima ne si'néami 'yemi mi yuwa.

¹⁷Nijé, Pablo, 'yemi mi je'ná jerigá osega ripora, nijé binói sikala jiti osogá, achigórigá mapurigá nijeni sinibí osá mapalini niwá bilé oselí. Nijeni sinibí je'ná jerigá osá. ¹⁸Nijeni wabé nakí mapu echi Walubela Jesucristo sinibí ne wabé galigá ku'wírama si'néami 'yemi. ¡Echirigá níima!